

27 MAR 1998

20,000 PENDUDUK KELANTAN SAMBUT DR MAHATHIR

KOTA BAHARU, 27 Mac (Bernama) -- Kira-kira 20,000 penduduk Kelantan terutama di jajahan Jeli akan menyambut ketibaan Perdana Menteri Datuk Seri Dr Mahathir Mohamad yang dijadual tiba esok untuk lawatan kerja setengah hari dan merasmikan persidangan perwakilan Umno Bahagian Jeli.

Perdana Menteri yang diiringi isterinya Datin Seri Dr Siti Hasmah Mohd Ali dijangka tiba pukul 9.40 pagi untuk merasmikan persidangan itu bertempat di Kompleks Umno Bukit Nangka.

Ketibaan beliau akan disambut oleh 144 anggota wanita Umno yang menjunjung 144 pal nasi semangat, barisan pemudi dan pemuda yang membawa bunga manggar dengan diiringi paluan muzik tradisional rakyat Kelantan.

Perdana Menteri juga akan merasmikan Kompleks Umno Bahagian Jeli yang baru siap dan menyampaikan hadiah kepada anggota veteran Umno yang berjasa kepada parti.

Dr Siti Hasmah pula akan merasmikan Dewan Badminton 1001 gelanggang berhampiran dengan kompleks itu pada 11.45 pagi.

Dr Mahahir kemudian akan berlepas dengan helikopter ke Grik, Perak untuk merasmikan persidangan perwakilan Umno bahagian itu pada pukul 12.30 tengah hari. -- BERNAMA

WM RHM RON